

Aningaaserivinni ileqqaakkat akileraarutitigut oqilisaaffigineqarnissaat pillugu Inatsisartut inatsisaat

§ 1. Ileqqaakkanut konto-ni ileqqaakkat akileraarutitigut oqilisaaffigineqartut ernialersorneqassapput tunngaviusumik ernianik akileraaruteqaataasussanik kiisalu ajunngitsorsiatut eriaanik akileraaruteqaataasussaangitsunik.

Imm. 2. Ajunngitsorsiatut erniat akileraarusernagit aatsaat tunniunneqassapput ileqqaakkat ataavartumik Kalaallit Nunaanni makku ilaannut ataatsimut arlalinnulluunniit atorineqarpata:

- 1) Namminerisamik illussamik sananermi pisinermiluunniit, aammalu piginneqatigiilluni illuliornermi.
- 2) Inimik attartornermut atatillugu aallarniutitut siumulluunniit akiliutitui. Tamakkunungali atugassatut annerpaamik qaammammut akiliutissatut isumaqatigiissutigineqarsimasup pingasoriaataa tunniunneqarsinnaavoq.
- 3) Inigisap pitsanngorsarneranut allilerneranulluunniit.
- 4) Allamik initaarnermut atatillugu illumi atortorissaarutininnaallagissamoortunik, pequtinin natersuarnillu pisinermut.
- 5) Namminersorluni ingerlatsivimmik pilersitsinermini, ingerlatsivimmi atugassat pisiarineranni akiusut 40.000 koruunit sinnersimappatigit. Ileqqaakkat akileraarutitigut oqilisaaffigineqarsimasut bilinik inunnik angallassissutinin pisinermut atorineqarsinnaangillat. Aningaasaliissuteqarfimmik assigisaaniluunniit ingerlatseqataaneq pilersitsinertut isigineqanngilaq.
- 6) Selskabini inuussutissarsiornermik ingerlatalinni piginneqatigiissutinin (aktienik anpartinillu) pisinermut. Tamatumani aningaasaliissuteqartarfiit inuussutissarsiornermik ingerlatsisutut isigineqanngillat.

§ 2. Tunngaviusumik erniat ajunngitsorsiatullu erniat akileraaruteqaataasussaangitsut annertussusaat, takuuk § 1, imm. 1, naalakkersuisunit nunatsinnilu aningaaserivinnit isumaqatigiinnikkut aalajangerneqartassapput.

§ 3. Akileraarutitigut oqilisaaffigineqartunik ileqqaaruteqarsinnaapput inuit tamakkiisumik akileraartussaataasut.

Imm. 2. Inuit toqqaannartumik kinguaaminnut, tamakkiisumik akileraartussaataasumut, akileraarutitigut oqilisaaffigineqartumik ileqqaaruteqarsinnaapput. Meerarsiat, aappaasup meerai aammalu tigummisatut meeqqat toqqaannartumik kinguaatut isigineqarput.

Imm. 3. Tunngaviusumik erniat ajunngitsorsiatullu erniat akileraaruserneqassatillugit konto-mik piginnittumut akileraaruserneqartassapput, imm. 2 naapertorlugu allat konto-mut

ikisisarsimagaluarpataluunniit.

§ 4. § 1, imm. 2-mi, nr. 1-imiit 6-imut taaneqartuni atugassanut inuk ataatsimut konto-liorsinnaavoq imaluunniit atugassaqarfiit ataasiakkaat immikkut kontoqartissinnaallugit.

Imm. 2. Imm. 1-imi konto-ni taaneqartuni uninngasuutit inummit ataatsimit pigineqartut konto-ni nuttarneqarsinnaapput.

Imm. 3. Ileqqaarutit akileraarutitigut oqilisaaffigineqartut Kalaallit Nunaanni aningaaserivinni taamaallaat pilersinneqarsinnaapput.

§ 5. Ileqqaarutitut akileraarutitigut oqilisaaffigineqartunut aningaasat taarsigassarsiat atorineqarsinnaanngillat.

Imm. 2. Inuup ataatsip ileqqaarutai akileraarutitigut oqilisaaffigineqartut ukiumut annerpaamik 50.000 koruuniusinnaapput.

§ 6. Uninngasuutit konto-ni akileraarutitigut oqilisaaffigineqartuni piginnittumit allanut tunniunneqarsinnaanatillu qularnaveeqqusiunneqarsinnaanngillat.

Imm. 2. Aningaasat uninngasuutit arsaarinnissutigineqarsinnaanngillat, akillisitsissutigineqarsinnaanngillat attoqqusaajunnaarsinnaanatilluunniit, konto-mik piginnittup ikisisulluunniit aningaasat konto-mut ikisai taassuma aningaasarsiorneranut pisuussutaanulluunniit annertuumik nikingassuteqartitsinngippata.

§ 7. Akiliisinneqarsinnaavoq piaaraluneerluni mianersuaalliorujussuarluniluunniit:

1) aningaasat tunniunneqartut, ajunngitsorsiatut erniat ilanngullugit, sumut atorineqartussaanerannut eqqunngitsunik paasinerluutaasinnaasunilluunniit paasissutissiisoq,

2) § 5, imm. 1-imik 2-milluunniit unioqquitsisoq.

Imm. 2. Najoqqutassiani, inatsit manna naapertorlugu aalajangersarneqartuni aklliisitsilluni pineqaatissiisinaanerit aalajangersarneqarsinnaapput.

§ 8. Naalakkersuisut, Naalakkersuisulluunniit tamatumunnga piginnaatitaasa inatsimmi matumani aalajangersakkanik unioqquitsisoq nalunaarfigisinnaavaat, suliaasaq eqqartuussisutigoortuunngitsumik aalajangiivigineqarsinnaasoq, unioqquitsisoq unioqquitsinermik nassuerpat, akiligassiissutigineqartorlu nalunaarummi allassimasoq piffissap aalajangersimasup, qinnuteqarnikkut sivitsorneqarsinnaasup, iluani akilerumassappagu.

Imm. 2. Nalunaarutiginninnermut, imm. 1-imi taaneqartumut atatillugu inatsisunik atortitsinnermut inatsimmi aalajangersakkani unnerluutiginninnermut allassimasut atuutissapputtaaq.

Imm. 3. Akiligassiissutigineqartoq piffissaagallartillugu akilerneqarsimappat imaluunniit akiligassiissutigineqareernermini akilersinneqarpat, qanoq iliuuseqartoqaqqissanngilaq.

§ 9. Akiligassiissutit, § 7 aamma § 8 naapertorlugu akiligassiissutigineqartut landskassemut nakkartassapput.

§ 10. Naalakkersuisut inatsisip matuma atortinnissaanut sukumiinerusunik malittarisassiorsinnaapput, kiisalu § 1, imm. 2-mi aalajangersakkanit immikkut akuersissuteqarsinnaallutik, pissutsit immikkut ittit

atuutsillugit.

§ 11. Inatsisartut inatsisaat atuutilissaaq 21. juni 1989 aallarnerfigalugu.

Namminersornerullutik Oqartussat, ulloq 6. maj 1989

Jonathan Motzfeldt

/

Emil Abelsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut